

deux . le troisieme s'appelloit separation , qui se faisoit selon la voluntè du prince, & dependoit de son arbitre .

*Des obseques antiques, & leurs ceremonies .*

**L**Es anciens Romains souloient ensepuelir les mortz de deux façons. la premiere estoit de les enterrer, & couvrir de terre. l'autre de les brusler: mais ceste façon ne dura pas beaucoup, le premier des Senateurs, qui après sa mort fut bruslé, ce fut Sylla . Numa Pompilius fut inuenteur des obseques, & y institua vn pontife, qui en auoit le soing. le premier honneur, que lon faisoit aux hommes Illustres , en leurs obseques , estoit de les louer avec vne oraison comme fit Cæsar aagé de douze ans aux obseques de son ayeul. Et Tybere aagé de neuf en celles de son pere . le secõd estoit de faire des jeux Gladiatoires, que Marcus, & Decius filz de Innius Brutus furent les premiers en honneur de leur pere. le troisieme estoit vn somptueux banquet . le quatrieme estoit dispenser de la chair a tout le peuple, & les premiers , qui en dispenserent furent ceux , qui auoient soing des obseques de P. Licinius treshonorable, & opulent citoyen. on auoit accoustumè mesmes quelquesfois après les obseques de resprendre sur la sepulture diuersité de fleurs, & odeurs , comme fit le peuple Romain a Scipion. On mettoit aussy es temples, & lieux publicz certains ornementz , comme boucliers, coronnes , & autres choses semblables ; & ceux qui ne pouoient estre ensepueliz avec telles pompes daultant que les frais en estoient insupportables, estoient ensepueliz, sur le tard, par ceux , qui a ce estoient deputèz nommèz Vespillones . Ilz enuoyent le corps mort a la sepulture reuestu de blanc. Son plus proche parent luy serroit les yeux, & vn peu après on ouuroit la chambre, & laissoit on entrer toute la famille, & le voysinagè , deux ou trois desquelz l'appelloient par son nom , a haulte voix iusques a trois fois, & après le lauoit on avec de l'eau chaulde , & l'heritier balioit la maison avec certains baletz a ce deputèz, & mettoit on sur la porte des brâches de cyprèz. Si le mort estoit persone d'auctorité les citoyens estoient inuitèz aux funerailles , par vn a ce deputè , & les femmes du mort s'habilloient de blanc . Et lors qu'vne veufue mouroit qui n'auoit eu qu'vn mary seul, on la portoit au tombeau avec la couronne de pudicité en teste .